

# → ISU

**51 SYOR PENAMBAHBAIKAN  
TANGANI PENINGKATAN  
KEMALANGAN JALAN RAYA**

## **RRP diberi tiga bulan kemuka laporan interim**

**Kajang:** Panel Semakan Pengesyoran (RRP) diberi tempoh tiga bulan untuk mengemukakan laporan interim pelaksanaan 51 syor penambahbaikan bagi menangani peningkatan kadar kemalangan jalan raya membabitkan kenderaan komersial.

Menteri Pengangkutan, Anthony Loke, berkata syor itu dicadangkan Panel Penasihat Bebas (PPB) berdasarkan hasil siasatan terperinci oleh Institut Penyelidikan Keselamatan Jalan Raya Malaysia (MIROS) berkaitan kemalangan bas di Kilometer 3.6 Jalan Genting Highlands-Kuala Lumpur pada 2013 yang mengorbankan 37 orang.

Katanya, RRP yang dibentuk pada 2017, diperkasakan semula dengan pelantikan beberapa ahli panel baharu, semalam.

“Saya sudah beritahu kepada Pengurus Bersama RRP, Tan Sri Lee Lam Thye, saya ingin melihat satu laporan interim secara terbuka dalam masa tiga bulan.

“Kita nak melihat semula semua cadangan dibuat dalam laporan bebas sebelum ini, berapa (syor) sudah dilaksanakan dan berapa yang belum serta yang berdepan kekangan.

“Dalam tiga bulan ini, RRP mesti keluarkan laporan ini kepada masyarakat umum supaya mereka tahu penambahbaikan dilaksanakan untuk memastikan keselamatan jalan raya di negara ini terjamin terutama membabitkan bas ekspres,” katanya pada sidang media selepas mengadakan lawatan kerja pertama ke MIROS di sini, semalam.

Terdahulu, beliau diberikan taklimat mengenai fungsi dan peranan MIROS dan turut memperkenalkan Ketua Pengarah MIROS yang baharu, Dr Siti Zaharah Is-hak.

### **Pemantauan lebih cekap**

Loke berkata penubuhan RRP bertujuan memastikan pemantauan lebih cekap dan berkesan terhadap pelaksanaan syor penambahbaikan itu.

Panel RRP itu diterajui Ketua Setiausaha Kementerian Pengangkutan, Datuk Seri Saripuddin Kasim selaku Pengetahui, manakala Siti Zaharah sebagai Setiausaha I.

Ahli panel lain adalah Presiden Institut Pakar Logistik dan Pengangkutan Malaysia (CILTM), Datuk Abd Razak Abd Malek; Presiden FOMCA, Datuk Dr N Marimuthu; Prof Dr Wong Shaw Voon dari Jabatan Kejuruteraan Mekanikal dan Pembuatan Universiti Putra Malaysia (UPM) dan Ahli Majlis Institut Jurutera Malaysia, Choo Kok Beng.

Prof Madya Dr Ahmad Kamil Arshad dari Fakulti Kejuruteraan Awam, Universiti Teknologi MARA (UiTM); Presiden Persatuan Pemandu Bas Semenanjung Malaysia, Saa'dan Man dan Editor Kanan Careta.my, Shahrim Tamrin turut dilantik buat pertama kali.